

東坡先生全集卷之五十五

尺牘

與程全父十二首

以下俱惠州

某啓去歲過治下幸獲接奉別後有闕上問過沐
存記遠辱手教且審起居佳安感慰兼集長牋見
寵禮意過當非衰老者所宜承當伏讀愧汗而已
未由會見萬萬以時自重不宣

二

某乏人寫公狀幸恕簡畧示諭固合如命但罪廢
閑冷衆所鄙遠決無響應之理近發書多不荅未

東坡全集卷之五十五
欲頻瀆也幸矜察愧愧

三

新詩過蒙寵示格律深妙非淺學所能髣髴歎誦
不已老拙無以荅厚意但藏去永以爲好爾忽忽
不謹

四

某啓新詩幸得熟覽至於欽誦老病廢學無以少
荅重意愧忤而已

五

別紙示喻具曉所是田地問得郡中猶取文字未

了切不可問也感掛意悚息悚息老拙慕道空能
誦楞嚴言語而實無所得見賢者得之便能發明
如此頌語精妙過辱開示感忤不已

六

令子先輩辱訪及客衆不及款語少事干煩過河
源日告伸意仙尉差一人押木匠作頭王臯暫到
郡外令計料數間屋材惟速爲妙爲家私紛冗不
及寫書千萬勿罪勿罪蔣生斫木亦告畧督之江
君訪別本欲作書醉熟手軟不能多書獨遣此紙
而已

七

某啓龍眼晚實愈佳時蒙分惠感忤不已錢數封
呈煩聒增悚增悚白鶴峯新居成從天侔求數色
果木太大則難活小則老人不能待當酌中者又
須土礶稍大不傷根者

柑 橘 柚 荔枝 楊梅 枇杷 松 栢

含笑 梔子

謾寫此數品不必皆有仍告書記其東西十二月
七日

八

令子先輩辱書及新詩感慰彌甚筆力益進家有
哲匠矣何復下問乎老病百事皆廢尤倦寫書故
止附此紙爾不別緘也不罪不罪

九

以下俱
儋耳

某啓別遽逾年海外窮獨人事斷絕莫由通問舶
信忽枉教音喜慰不可言仍審起居清安眷愛各
佳某與兒子粗無病但黎蜨雜居無復人理資養
所給求輒無有初至僦官屋數椽近復遭迫逐不
免買地結茅僅免露處而囊爲一空困厄之中亦
何所不有置之不足道也聊爲一笑而已平生交

東坡全集卷之五十三
舊豈復夢見懷想清游時誦佳句以解牢落此外
萬萬以時自重船回忽忽布謝

十

某再啓閣下才氣秀發當爲時用久矣遐荒安可
淹駐想益輔以學以昌其詩乎僕焚筆硯已五年
尚寄味此學隨行有陶淵明集陶寫伊鬱正賴此
爾有新作逋中示數首乃玆惠也山川風氣能清
佳否孰與惠州比此間海氣鬱蒸不可言引領素
秋以日爲歲也寄貺佳酒豈惟海南所無殆二廣
未嘗見也副以糖水精麪等物一一銘佩非眷存

至厚何以得此悚忤之至此間紙不堪覆篋携來者已竭有便可寄伯枚否不必甚佳者不罪不罪

十一

某啓便舟來辱書問訊旣厚矣又惠近詩一軸爲賜尤重流轉海外如逃空谷旣無與晤語者又書籍舉無有惟陶淵明一集柳子厚詩文數策常置左右目爲二友今又辱來貺清深溫麗與陶柳眞爲三矣此道比來幾熄亦豈有語此者耶新春伏想起居佳勝某與小兒亦粗遣困窮日甚親友皆疎絕矣公獨收卹如舊此古人所難也感忤不可

言惟萬萬以時自愛爲祝舶回奉啓布謝萬一不
宣

十二

某啓久不得毗陵信如聞浙中去歲不甚熟曾得
家信否彼土出藥否有易致者不拘名物爲寄少
許此間舉無有得者卽爲希奇也間或有麤藥以
授病者入口如神蓋未嘗識爾

與程秀才三首

以下俱
儋耳

某啓去歲僧舍屢會當時不知爲樂今者海外豈
復夢見聚散憂樂如反覆手幸而此身尚健得來

訊喜侍下清安知有愛子之戚襁褓泡患不須留
戀也僕離惠州後大兒房下亦失一男孫亦悲愴
久之今則已矣此間食無肉病無藥居無室出無
友冬無炭夏無寒泉然亦未易悉數大率皆無耳
惟有一幸無甚瘴也近與小兒子結茅數椽居之
僅庇風雨然勞費亦不貲矣賴十數學生助工作
躬泥水之役愧之不可言也尚有此身付與造物
聽其流轉流行坎止無不可者故人知之免憂乍
熱萬萬自愛不宣

近得吳子野書甚安陸道士竟以疾不起葬於河源矣前會豈非夢耶僕旣病倦不出出亦無往還者闔門面壁而已新居在軍城南極湫隘粗有竹樹烟雨濛晦真蜺塢獠洞也惠酒佳絕舊在惠州以梅醞爲冠此又遠過之牢落中得一醉之適非小補也

三

兒子到此抄得唐書一部又借得前漢欲抄若了此二書便是窮兒暴富也呵呵老拙亦欲爲而目昏心疲不能自苦故樂以此告壯者爾紙茗佳

惠感忭感忭丈丈惠藥米醬薑糖皆已拜賜矣江
君先辱書深欲裁謝連寫數書倦甚且爲多謝不
敏也

與林天和二十四首

以下俱
惠州

某啓近辱手書冗中不卽荅悚息春寒想體中佳
勝火後凡百勞神勤民之意計不倦也未由披奉
萬萬自重不宣

二

某啓專人辱書具審起居佳勝爲慰春物益妍時
復尋賞否想亦以少雨軫懷也未由往見萬萬若

東坡全集卷之五十五
時愛攝不宣

三

某啓多日不奉書思仰之至伏暑尊候何如惠貺
荔子極佳郡中極少得與數客同食甚幸幸未由
會合萬萬以時自重

四

某啓近數奉書想皆達雨後晴和起居住勝花木
悉佳品又根撥不傷遂成幽居之趣荷雅意無窮
未卽面謝爲媿人還忽忽不宣

五

花木栽感留意惠貺鹿肉尤增慚荷某又上

六

某啓昨日辱訪別尤荷厚眷老病龍鍾不果詣送愧負多矣經夕起居何如果成行未忘已爲民誰如君者願益進此道譬如農夫不以水旱而廢穠蓂也此外萬萬自重

七

某啓辱教承微恙已平起居輕安甚慰馳仰暑雨不常官事疲勩攝衛爲艱惟加意節調以時休息爲佳也忽忽不宣

八

某啓近辱過訪病中恨不款奉人來枉手教具審
起居佳勝至慰至慰旦夕中秋想復佳風月莫由
陪接但增悵仰也乍涼千萬自重

九

某啓從者往還見過皆不款奉愧仰可勝辱書承
起居佳勝聞還邑以來老穉鼓舞數日調治想復
清暇矣歲暮萬萬自重

十

小兒往循已數月矣賤累閏月可到此新居旦夕

畢工承問及感感領書及惠筓蕨益用愧感聞相
度移邑果否

十一

某啓辱手教伏承起居佳勝甚慰馳仰承問賤累
正月才到瀨上閏月上旬必到此也考室勞費乃
老業也旦夕遷入未由會面萬萬以時自重

十二

某啓辱書承起居佳勝示諭勿累已到城流寓中
一喜事然老穉紛紛口衆食貧向之孤寂未必不
佳也可以一笑蒸鬱未解萬萬自重

十三

骨肉遠至重爲左右費羊麪鱸魚已拜賜矣感忤之至

十四

某啓辱手教承起居佳勝久以冗率有闕馳問愧念深矣承惠龍眼牙蕉皆郡中所乏感忤之至未由瞻奉萬萬自重

十五

高君一臥遂不救深可傷念其家不失所否瘡痍橫流僵仆者不可勝計柰何柰何某亦旬浹之間

喪兩女使況味牢落又有此狼狽想聞之亦爲撫然也

十六

某啓人來辱書且審比日尊候佳勝甚慰所望加減秧馬曲盡其用非撫字究心何以得此已具白太守矣乍熱萬以時加嗇不宣

十七

某啓人來辱手教且審起居住佳勝吏民畏愛謠頌布聞甚慰所望秧馬聊助美政萬一爾何足云乎承示喻愧悚之至僧磨已成秋涼當往觀也毒熱